

Octroi waarby Prince WILLEM I.
 VAN ORANGE, als Markgrave van
 Vere, toestemd de vernieuwinge
 en verandering der Gildebrieven
 van de respectie Gildens dier
 Stede, door Stads Regeering ge-
 daan, en toestaat zy die steeds
 mogen veranderen en vernieu-
 wen.

15 September 1582.

WILHELM by der gratien Gods Prince van Orangien,
 Graue van Nassau, van Catzenellenboghden, van Vla-
 den, Dietz, Linghen, Bueren, Leerdam etc. Marquis
 van der Vere ende van Vlisfingen, Heere ende Baroen
 van Breda, Diest, Grimberghen, Arlay, Nozery etc.
 Erffburggraue van Ahtwerpen ende van Besancon, Gou-
 verneur Generael van Brabant, Hollant, Zeelant, Vries-
 landt ende Vtrecht. Allen den ghenen dien desen teghen-
 woordige ghetoondt sullen worden Saluyt! Van weghen
 den Burghmeesteren, Schepenen ende Regierders onser
 Stede van der Vere is ons teghenwoirdichlyck verthoont

hoe dat zy langhen tyt voir de vercoopinghe der seluer Stede ende onze huldinghe, op het ernstich versouck ende aenhouden van den Dekens ende Gildebroeders van den Schoenmakers, Cramers, Cleermaeckers ende bakkers, tot weluaren ende voorderinghe van de selue Gildens, heure Gildebrieuen hebben verandert ende vernyeuwet naer ghelegenheyt des tyts, ouermits daer inne eenighe poincten waren die deur veranderinghe van tyde buyten ghebruyck ghecome syn, soo belanghende de Infettinghe van Missen ende offeranden te doen, in de processe te ghaen met het ghevolch van afgoderye, als oock eenighe andere nootlycke poincten tot opbouwinghe van de selue Gildens, ende consecratielyck tot weluaren der voorsz. Stede; Dat oock zy Wethouders daghelycx versocht worden van weghen de andere Gildens van de neringhe derseluer Stede, omme van ghelycken heurlieder Gildebrieuen inhoudende ordonnancie op deselve Gildens ghemaect vernyeuwt ende verandert te worden naer ghelegentheyt van den tyde, al 't welcke in voortyden plach te geschieden by den Heeren Marquisen van der Vere naer voirgaende aduis van die van der Weth der seluer Stede, die in zulcke saecken den Heeren volcomelyck hebben connen onderrichten. Ende alsoe wy ouermits onse groote, menichfuldighe ghewichtighe affairen in desen jeghenwoirdighen tyt tot 't gundt voorsz. qualycken connen vaceren, ende dat des nyet te min de Wethouders tot de veranderinghe ende vernyeuwinghe van de voorsz. Gildebrieuen nyet en souden willen verstaen, sonder ons expres consent ende autorisatie, ons daeromme seer ootmoedelyck biddende, mijsgaders oock te willen confirmeren de veranderinghe ende vernyeuwinghe by hen lieden hierinne gheschiet, DOENTE WETENS, dat wy de saecken voorsz. ouerghemerkt, ende ryelyck daer

daer op gheleth hebbende, willende vuyt zekere confirmatien ende merckelycke redenen den bouengemelde Burgemeesteren, Schepenen ende Regierders hier inne be-
 lieuen, hebben geconfirméert, gheratificeert ende geap-
 probeert, confirmeren, ratificeren ende approberen mits
 desen, de veranderinghe ende vernyeuwinghe van de
 Gildebriuen bouenghenoept by den seluen Wethouders
 ghedaen voir de vercoopinghe der seluer Stede in der vue-
 ghen ende manieren soe 't selue by hen lieden gheschiet
 is. Gheuende vuyt onser rechter wetentheyt volcomen
 macht, autoriteit ende speciael beuel den voorsz. Wet-
 houderen in der tyt zynde, omme de Gildebriuen van
 de andere Ghildens insgelycx te veranderen, te ver-
 nyeuwen, te augmenteren oft te dimnueren naer ghele-
 gentheyt des tyts, ende soe als zy tot meesten oirboor
 ende weluaren van de voorsz. onse Steden zullen beuin-
 den behoorende; willende ende ordonnerende, dat alle
 ghene by hen lieden in desen is ghedaen ende gheordonneert,
 ofte als noch volgens dese onse briuen van Oñroy ghedaen
 ende gheordonneert sal worden, voor goet, vast ende van
 weerden ghehouden, ende by eenen jegelyken sonder we-
 dersegghen achteruolcht worde. Ontbieden daerom onsen
 Officier van der Vere, mitsgaders allen ende legheleycken
 onsen onderstaen, aldaer dien 'taengaen mach, dat zy den
 bouengenoemde Wethouderen van desen onsen teghen-
 woordighen consente ende Oñroy rustelyck ende vrede-
 lyck laeten ghenieten ende ghebruycken, sonder hen daer
 inne te doen nochte laeten gheschieden eenich hinder,
 bestel oft moyenisse ter contrarien, maer eer alle goede
 hulpe ende bevoirderinghe. Des 't oirconden heb-
 ben wy dese met onsen naeme gheteckent ende onsen
 seghel daer onder aen doen hanghen. Ghegheuen in der
 Stadt van Antwerpen op ten xven dach Septembris des
 Jaers

Jaers xv^c. ende tweeën tachtich. gereekend. Guillaume
 de Nasfau. op de pycque staat. By mynen ghenadi-
 ghen Heere den Prince. geteekend. N. Bruyninck. Door
 de pycque is 's Princen Zegel is rood was aan een dob-
 bele perkamente steert uithangende.